

REGIONAL NEWS BULLETIN

HEADLINES (EVENING)

- 1. Union Minister of State for Home Affairs Pu Nityanand Rai chuan Mara leh Chakma Autonomous District Council te vawiin khan a tlawh.
- 2. PWD Minister Pu Vanlalhlana an ATL Road siamtu BEL te Security depost leh a pung Rs Vbc 90 leh nuai 69 chu Sorkar sum bawmah a luh tawh avangin ATL Road pawisa bik a ni tawh lo a ti.
- 3. Reserve Bank of India chuan bank ten sum an puk punna repo rate chu point 25 in a tihniam
- 4. Prime Minister Narendra Modia chuan sik leh sa inthlak nasa chu buaina lian tak anih thu a sawi



UNION MoS Home VISIT ADC’s

Union Minister of State for Home Affairs Pu Nityanand Rai chuan Mara leh Chakma Autonomous District Council te vawiin khan a tlawh a,

Vawiina Siaha District a tlawhna ah thusawiin Union Minister Pu Nityanand Rai chuan Citizenship Amendment chungchang sawiin ram chhunga Sakhaw dang vuantute nekchepna a ni lo a ti a, Ram thenawm leh ram danga Sakhwana avanga tihduhdah tuarte tan zalen taka an chen theih nan leh India ram chu Sakhaw hrang hrang vuantuten zalen taka an awm theih nana duan a ni a ti.

Union Minister chuan Siaha District chu Ram dang nena ramri nei a nih avangin a venhim kawngah mipui tawiawmna a pawimawh hle a ti a, National Education Policy 2020 hnuaiah pianpui tawng a zirlaiten an zir theih chu NEP 2020 thil tum pawimawh tak pakhat a ni tih sawiin Hindi tawng chawisan tumna nilovin Ram chhunga tawng chi hrang hrang awm te chawisan nana duan a ni tih a sawi.

Chakma Autonomous District Council pawh tlawhin, a puala CADC Hall – a inkhawm buatsaihah thu a sawi a, Pu Nityanand Rai chuan Autonomous District Council pathumte tan sawrkar laipuiin theihtawp a chhuah zel dawn a ti a. Myanmar leh Bangladesh nena ramri nei vek an nih bawk avangin, ramri venhim kawngah pawh theihtawp a thawkho turin a chah a. Pu Nityanand Rai chuan India khua leh tui an nihna hrechiana, ram leh hnam hmasawnna tura theihtawp chhuah fo thin turin a sawm nghal bawk.



WATER SCARCITY

PHE Engineer in Chief Pu H Duhkiman Mizoramin tui harsatna a tawh chhoh zel avangin tui dahkhawlna tur siam uar tura harhthar na a thlen a pawimawh a ti.

Lunglei khawpuiin tui harsatna an tawh avangin Pu H Duhkima chuan tukin khan Lunglei khawpui tui lakna Pialthleng hmun a tlawh a, E-In-C chuan Thal khawro avangin tui a tlem nasa hle a, litre mtd 10 velin a kiam a, tui an ti pung thiam si lova, tui kang an nghak a ni ber, a ti.

Fur lai a tui dahkhawlna neih a hlut zia hriat thar ni se, luikam vah chereu a pawl takzet a, sum tamtak seng a tuikhuah a ngai tan ta a ni, a ti a. Mahni a tui a intodelh vek turin tan lak ni se a ti a ni.

Pu Duhkima chuan tuna Tlawng lui an khuah chuan thla 2 chu mipui chawm thei turah an ngai tih a sawi a, ruah a sur lo reng anih chuan Lunglei khawpui chhungah Truck a tuisem mai pawh a ngaih a rin thu a sawi.

PHE hotute hi Sub.Hqtrs YMA leh MJA member ten an tawiawm a ni.

<><><>

PWD MINISTER

PWD Minister Pu Vanlalhlana an Aizawl-Thenzawl-Lunglei Road siamtu BEL te Security deposit leh a pung Rs Vbc 90 leh nuai 69 chu Sorkar sum bawmah a luh tawh avangin ATL Road pawisa bik a ni tawh lova, a tul ang angin Sorkar in a hmang thei a ti a, a thawhkhat nan chengVbc 44.80 in Mauseh leh Pukpui inkar siam tum a ni a ti.

PWD Minister hian vawiin khan Lunglei Press Club-a Press Conference kovin ATL Road siam tur chungchang hi a sawifiah a, Assembly Session-ah khan he pawisa hi pawh then a ni ang ti zawng a sawina a neih awm a hriat loh thu leh a lo sawi anih chuan Lunglei mipui te hriatthiamna a dil tih a sawi a. A tir a kawng siamtu a hnua ban tak BEL te Security deposit leh a pung Rs Vbc 90 leh nuai 69 chu Consolidated Fund-ah a luh vek tawh avangin Sorkar in kawngpui pawimawh leh ngaihmanhawm zual laite siam that nan a ruahman tih a sawi a, Lunglei lam siam nan cheng Vbc 45 leh nuai 90 dah in Aizawl khaw chhung kawm siam nan cheng Vbc 44 leh nuai 80 dah a ni a ti.

Lunglei kawng siam nan hian a tul anga pawisa hi pek leh tur a ni tih sawiin Financial Year 2024-2025 sum hmangin Phase-I Mauseh atanga Pukpui hi SLC Construction Ltd.chuan an siam dawn a, April ni 16 ral hma in kut an thlak ang a ti. Kum 2025 fur chhung hian kawng siam turin a huam loh pawh mipui an buai loh nan Sorkar chuan a vil reng dawn tih a sawi bawh.

PWD Minister chuan ATL Road pawisa ni a sawi chungchanga inhriatthiamlohna chu MZP hrutute nen in hrilhfiyah a, an hrethiam hle a, Lunglei hmasawn nan thahnemngai taka thawk tlang turin an inthlah tih he hunah hian chanchinbumite zawhna chhangin a sawi a ni.

Hehunah hian, Estimate Committee ten BEL pawisa an dah leh a pung chu ATL Road siam nan an rawt chungchanga zawhna chhangin Minister tawiawm tu Dy Speaker Pu Lalfamkima chuan rawtna a ni mai a, an rawtna chu tih ngei ngei tur tihna a ni lo a ti a ni.

Vawiin khan Lunglei MZP Hqtrs buaisaihin Lunglei Venglai MIZOFED kawt ah Aizawl to Lunglei via Thenzawl Road ATL road siam nan a Rs vbc 90 leh nuai 80 atanga Mizoram sorkar in Rs Vbc 40 pawhpen a awm ni a sawi, an duhlohna lantirin hun an hmang a. Thusawtu hrang hrang Sub.Hqtrs YMA aiawh, MSU aiawh, Lunglei Thalai Pawl aiawh te bakah MZP Hqtr. President Johan Hmangaihzuale ten thu an sawi a, thusawitu te hian Thenzawl piah atangin Lunglei kawng chu a chhe bik a, chuvangin a siamthatna tur Rs vbc 90.69 pawhpen an remti lo tih an sawi.

<><><>

MANIPUR MLA VUNGZAGIN

Kum 2023-a Manipur tualchhung buaina thlen tuma mipui kut tuar Manipur MLA Vungzagin Valte chu Delhi-a hun rei tak enkawl anih hnuah vawiin khan Mizoram-ah phurh thlen a ni. Kum khat chuang damdawiina enkawl anih hnuah tun tum hi hmarchhaka a lo let leh hmasak ber a ni a. Mizoram atang hian helicopter hmangin Manipur panpui a ni ang. Vawiin khan Lengpui Airport ah MLA Pu Ginzalala chuan Pu Vungzagin-a hi Mizoram sawrkar aiawhin a lo hmuak a. Mizo Students Union (MSU) pawhin lawmna hun an lo buatsaihsak a ni. Pu Vungzagin-a chuan chanchinbumite kawmin a hliam enkawl naah Manipur sawrkar atangin sum leh pai a dawng tlem hle tih a sawi a. Manipur Chief Minister hlui N. Biren Singh-a chu na taka demin atir atangin Zo hnamte a hua niin a puh a ni.

<><><>

KHAWZAWL

Khawzawl District chhunga awm Vangtlang khuaah chuan an khawtlangah mitthi an awmin Vangtlang Branch YMA in thlan thut ni-ah khawhar chhungte hna a tul a piang an thawhsak.

Vangtlang khuaah hian kum 20 chhung chu an khawtlangah mitthi an awmin Vangtlang Branch YMA Member ten mitthi chhungte chu thlan nghah ni apiangah a tul ang apiang hna an thawhsak thin a. Thawhtanni pawh khan an khuaa chhiat tawh chhungkua te chu mang an khawhsak a, hetah hian YMA Member 50 vel an thawk chhuak thei a. Tumdangah pawh khawhar chhungte thing eh sak te, lo vah sak te, buh phun sak te leh buh seng sak te in an lo hnatlang tawh thin a ni.

Khawvel thang chho zelah Zofate khawsak a sang chho zel a, tun hmaa tih theih thin tih rem tawhlo tam tak awm tawh a, mitin mahni hna theuha an buai tawhna khawvelah midangte inngaihsakna hun siam a har ta hle a, Hmasawwna in a ken tel ni mahse Zo nun ze mawi Tlawmngaihna la chhawm nung tlattu Vangtlang khaw chanchin hi a ngaihnawm hle a ni. Vangtlang khua hi Khawzawl atangin Km. 40 a hlaah an awm a, an khuaah hian chenna in 100 vel a awm a ni a, an khaw chin dan khawsak phung mawi tak hi chanchin ngaihnawm a tling a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

RBI

Reserve Bank of India chuan bank ten sum an puk punna repo rate chu point 25 in a tihniam. Hei hi a hma aiin zaa 6 in a hniam a ni. Tun hi kum nga chhunga repo rate a tihhniam vawi hnihna a ni tawh a. RBI Governor Sanjay Malhotra chuan member paruk awmna committee chuan lungrual takin repo rate tihhniam hi an rel tih a sawi a. Hei bakah hian RBI Governor chuan ram sum dehchhuah GDP thanna tur pawh ennawn anih thu sawiin kum 2025-26 chhungin zaa 6.5 anih tur thu a sawi a. Ahmaa an lo chhutlawkna zaa 6.7 aiin an tihniam a. Thil man sang tehna retail inflation p[awh 2025-26 chhungin zaa 4 turin a chhut a ni.



PM

Prime Minister Narendra Modia chuan sik leh sa inthlak nasa chu buaina lian tak anih thu a sawi. Vawiina Navkar Mahamantra Divas lawmna New Delhi-a neihah he thu hi sawiin Pu Modia chuan sik leh sa inthlak siam tha tur chuan Jain sakhawa zuitute nunphung ang nunphung dik neih a ngai tih a sawi a. Jain zawmtute chuan hun rei tak nun tlawm, insumtheihna leh nun daihrei an lo kalpui tawh ani a ti bawk

